

## 2 Corintios

### *'Ka amøñigueh' chib pørig*

<sup>1</sup> Tius nan trendø treeg kørnrain kuikkurri, na Pablo Cristo Jesús nøashib karua ørig, namui nuneg Timoteoba misra, Corintosrø iglesianba, katø tru Acaya pirau muba kuimburaB Tiuswei misaamera warabelanba i kilgawan pørar. <sup>2</sup> Tius namui Møskaweimba, Señor Jesucristoimba tru ka yandø tab indig køben, chi isumgaig tab købig køben ñimba kørnrai inder.

### *Chine isumdeelø nebuingucha Pablo Tiuswan 'ungwa, ungwa' tailø*

<sup>3</sup> Tru namui Señor Jesucristoi Møskai, Tiusbe mayanguen tabig wamindig kørnrun, tru lastima ashib pønrrabelø kømigwan tøga Møskai, katø isui meløben chiyutøgucha isui inchimønrrai purugub Tiuswan. <sup>4</sup> Truibe nam chine puig meløben, namun tab kui mørtraai purugubig køn, katøganelø chiyugøben treetøwei isui meløben, Tius namun isui inchimønrrai purugúitøgatøwei namgucha purugubelø kømig kørnrai. <sup>5</sup> Criston tru chine, chine kaig nebuilø namuinug treetøwei itømaytø nebub arrubene, katø treetøwei tru isui inchimønrrai purugúikkucha tru kuindø, tru kuindø Cristoinukkurrindøwei arrubig køn. <sup>6</sup> Inchendø namun chine puig melamig arrubiibe, ñim chi isui inchimø tab kui pønrramigweyasiiba, kaigygurri wesrailø kømigweyasiiba køn. Inchen namun tru isui inchimø pønrramig kørnrai publiibe, tru ñim chi isui inchimø pønrramig kørnrain kua, tru namun isui melamig nebub lataitøwei ñimun treeg nebub arruben, ñim chigúingucha melabig melamig truibe treeg attrun. <sup>7</sup> Inchawei nam

ñimuimburab øyah kønrrunmab isuibe treeg kønrrab køn. Pøs nam chine kaig nebuinab melaiguma treetøwei ñimgucha pønrrabelø kuig køppe, nam chi isumø tab kui pønrraigugucha, ñimbe treetøwei tab kui pønrrønrrab kui asha pønrrer.

<sup>8</sup> Namui nunelø, namun Asia pirausrø purø isumdiig nebui melaigwan ñim wammøra kønrrai inder. Yandø mu melamgaig trømbøig arruptø, namuinetøbe yandø chinchamelaig purø trømbøig køben, yandø ke øsig webammumuitamab isubelø ker. <sup>9</sup> Pøs nambe ke yandø kwamigu puermaptøwei isub melabelø ker. Pøs øyeeg puppe, nam namasiitø namdø tsabø kermab isubelø kønrrain kømøtø, Tius tru kwailanguen katøle øsiirangarub kusrubigwan isua pønrrabelø kønrrain kuig køn, <sup>10</sup> tru øyeeg trømbøig ke kwamitø palab melaigugurri nø namun ka puraambingarub, katø namun ka puraambub ambamig kønrrai martrabigwan. Incha nambe ke nuinuutø isua meler, ka puraambub ambamig katøgucha namun ashib pasrønrrab kui, <sup>11</sup> ñim Tiuswan namuyasig ‘purugurra’ chib miab meløbene. Øyamay truba yamelø namuimburab Tiuswan ‘mayanguen ungwa, ungwa’ chib kønrrun, pøs truba yamelø misra Tiuswan namuimburab miaben løtigwan nam truba nu purugúig utikkurri.

*Pablo Corintosromay chindimba imuigwan eshka*

<sup>12</sup> Kaguende nam tab kui mørøb pønrraibe iig køn: yu pirau namui isub kebachib pasrabigu ‘chi kalø marig køn’ chibig chigaig pønrraig, mas ñimui utube katøguchinguen isuptø amønaig købig køn. Amønippe, tru newan chishchiitøgaba, sørato kømø, sølwan marig Tiusweinukkurri arrubiitøgaba nambe amønaig køn, chine nørø kusreelø møguelainukkurri arrubiitøga mar-møtø, Tiuswei ka yandø tab indiitøga marøb. <sup>13</sup> Pøs nam

ñimun kilga pørøppe, chi peg waminchibikkucha kørnrab kømøtø, ñim chi leb kuigwan ñim chigúi nebua mørøb kuigwan truigwan newan chigúi mørtraimab isua pører. <sup>14</sup> Inchawei namuimburab mayandøguen nebua chigúi mørig køppe, pøs ñimbe tab newan chigúi mørtrun, ñim namuimburab tab kui mørøb pønrramig kørnrai, tru nam ñimgurri tab kui mørøb pønrramig kørnrab køb lataitøwei tru Señor Jesús arrub kwaløm.

*Pablo Corintosø ashchab inrrab waminchib*

<sup>15</sup> Inchawei nabe iigwan treeg kørnraitamab isua, ñimuisrømaymerrig attrab isuig køn, ñim srøsrø truba tab kui nan utig kømnetø katøle nan tab kui utamig kørnrai. <sup>16</sup> Incha Macedoniasrømay pureppe, ñimuinug pua puraya, katøle trusrøngurri arruppe, ñimuinug puatøweim purainrrab isuig kuig køn, ñim nan Judeasrøngatig yamigwan purugunrrai. <sup>17</sup> Tru na øyeegwan martrab isuibe, ¿kabe nabe ke mõi mõi martrab kurrig kørnrab kø chindah? ¿Kabe tru na øyeeg martrab indiibe, nai isuigu Tiuswan ashmø misaamera lataig martrab inchibig kua, mõiindø ke: “Martrab” taitø, katø: “Marmønrrab” taitø inchab inditamagueh?

<sup>18</sup> Pøs Tiusbe nø maig chippe, nøbe treegwan marøbig køb lataitøwei, nam ñimun wamindiibe mõiindø: “Øn” taitø: “Ka” taitø indig kømøtø køn. <sup>19</sup> Kaguende ñimui utu na køben, Silvano køben, Timoteo køben, nambe Tiuswei Nusrkai Jesucristoimburab eshka kusrenanig køn: “Øn” tantø: “Ka” tantø indig kømøtø, nuinuube chu uraskucha: “Øn” taig. Nøbe truig køn. <sup>20</sup> Kaguende Tius kerrigu nø chi martrab cha kørømisriiløbe Cristoinuube: “Treeg martrab” taig, truig køn. Inchawei nambe Cristogurri: “Treeg køn” chibelø ker, namgurri Tiusbe mayanguen tabig wamindig kørnrai. <sup>21</sup> Inchen Tius nøtøwein køn Cristoinug mur pønrramig kørnrai marøbiibe namun lata,

ñimun lata. Incha namune nuindø kønrrai tarømara pønsra, <sup>22</sup> nuielø kønrrai sellotøga sellawa, namui manrrau pasrønrrai Espiritu Santon katsig pasra tranøbguen indig køn, tru tranrrab kørrømisrigwan kutøguewan tranrrab kui asamig kønrrai.

<sup>23</sup> Pøs nabe Tiusken ashen trendamønrrun: Na Corintosrømay katøgucha arrumuppe, na ñimun kaluguetømønrrab lastima ashiptø arrumuig købig køn cha. <sup>24</sup> Kaguende ñimui isubigwan Cristoing pasra pønrramigwane treeg pønrrønrrai inchib ke nam karub pønrrønrrab kømøtø, masken ñim kasrag pønrrønrrai nambe purugubguen pønrrer. Kaguende ñimbe tru isubigwan Cristoing pasra pønrraikkurriwei ñimbe mur pønrran.

## 2

<sup>1</sup> Inchawei na katøle ñimuisrømay arruppe, nabe ñimun truba truba isui inchain kømøtø, attrab isuig kuig køn. <sup>2</sup> Kaguende na ñimun isui inchai marene, trube, ¿nane mu kasraarantiasamø? ¿Tru na isui inchai mariiløtøwei kasraaranmønrraitarru? <sup>3</sup> Inchawei nabe øyeekkurri tru merrab kilgawan na pørøppe, tru nanguen kasraaranrrabelø na trusrø puben, nan isui indingarumønrraim pørig køn. Pøs na kasrag pasrøbene, ñimgucha chiguen kømøtø, mayeeløba treetøwei pønrrønrraimab isuague. <sup>4</sup> Kaguende nabe ñimun pørøppe, truba truba isui pørig kuig køn, nai manrraube purø tab kømui, truba kappin kørrøgøb. Kabe na ñimun truba truba isui inchai martrab kømøtø, nabe ñimun truba truba undaguig kui ashchai indig købig køn.

*Kalø marøbigwan Pablo truburø ulø paymub*

<sup>5</sup> Tru øyeeg isuim pasrønrrai møikkøben treeg marøbiibe, nandø kømøtø, kan mayangatig ñim mayeelamba isui

inchai mara pasran tamønrrun, ke menrra inchimøn-  
rraptø. <sup>6</sup> Inchawei tru mowan ñim mayeelø lutaelø  
misra, nui kalø marigwan øl martrab ñim asha mari-  
ibe yandø tsabø køn. <sup>7</sup> Truigwane yandø ulø payib  
kømø, pesannab, masken kuñab purugumig køn, isubi-  
itø yandø kerriguwan mandøguen kømui inchimønrrai.  
<sup>8</sup> Inchawei nabe ñimun tru moweimburað ñimui undag  
købigwan katøle tiusmanda kenamaray tamønrrun, ñim  
undaguelø kui nø ashchai. <sup>9</sup> Kaguende na ñimun pørøppe,  
øyeegwan isua pørig køn, chiyutøgucha maig taigwan  
ñim mørøbelø kətashchab ashchab isua. <sup>10</sup> Inchawei  
chigøben kalø marøbigwan ñim chi ulø paymø pesan-  
nanrrab isua kørromarene, nagucha nune treetøwei ulø  
paymø kørromisramønrrun. Pøs chi kalø marigwan na  
ulø paymø, pesannappe, (ulø paymumig chi pønrraig kuig  
køh chindindøbe køben) ñimgurri treegwan marig køn,  
Señor Jesucristoi merrab, <sup>11</sup> namun Satanás kegørørørkøb  
nø kanailø kømønrrab. Kaguende nambe tsabø ashibelø  
ker nøbe chitø martrab inchibig kuigwan.

*Cristotøgabe kanawa puraamba pønrramig*

<sup>12</sup> Na Troas ciudasrø, Cristoi tabig srø wamwan eshkab  
kusrenanrrab pubene, Señorweimburabelan maramig  
yaskappe tabig kurøppe kurendø, <sup>13</sup> nai nuneg Tito  
trusrø mu kaagøptinchene, nane nai isubigube ni mu-  
mayguen kømuben, nabe trusrøngurri nømun ungua  
chippa, Macedoniasrømay ibig kur.

*Tiuswan 'ungwa, ungua' taig*

<sup>14</sup> Inchendø Tiuswan 'mayanguen ungua, ungua' chin-  
rrab, Cristoinuube nam kaigwan kanawa ¡katø! luchimíig  
tsimaytø puraambub ambamig kønrrai marøb, katø  
tru Cristoimburað nebua asiiløbe purø may irrabzhig  
lataig chutøgucha namgurri larrøbitchai marøb Tiuswan.

<sup>15</sup> Kaguende Tiusweimbe nambe Cristoi tru purø may irrabzhig latailø ker, kaigyugurri wesraig pørrabelai lata, tru managatig pinab pinamsrømay amrrab pørrabelai lata. <sup>16</sup> Incha møilø tru pinab pinamsrømay amrrabelaimbe tru irrabiibe kwaitø irrøben, katøganelø kaigyugurri wesrailaimbe tru may irrabiibe øsig kømigwan irrabig køn. ¿Inchen øyeegwan marøb pasrørraptiibe mu kø chinderah? <sup>17</sup> Katøganelø misaamera truba nørrø tru Tiuswei wamwan kan chigucha kømfig kui lataig an marøb srua llirabelø latawei, nambe treetøwei marøb pørrømeelø ker. Treeg kømøtø, Tiuswei merrab waminchippe, maig wamindamigwan søra kømø, sølwan waminchib, Tius øriilø kermab isua, Cristogurri waminchibelø ker.

### 3

#### *Tru srøig 'øyeeg, øyeeg martrab' cha kørømisrig*

<sup>1</sup> ¿Kabe nambe katøguen namashib chi isumgaig 'tabelø ker' chib waminchib pørrabra chindah? ¿Kabe nambe katøganelø latawei chi isumgaig tabelø kui ashchai, kilga pøriilø ñimun tranamig, kabe ñimgurri kilga pøriilø namun tranamig palaim pørrabra chindah? <sup>2</sup> Nam mailø kuigwan treeg asønanrrabelø tru namuyasig kilga pørig latailøbe ñimwein køn, tru ñim purø tabig amønaig, tru namui manrømerayu pørig pasrabig, mu misaameratøgucha ñimun mumera køtashib, mailø køtashib ashib tøgagúilø. <sup>3</sup> Ñimbe tørgandø asamdeelø køn, kan kilgayu Jesucristo nøashib pøri latailø, tru namui maramigwan marøb pørrailøygurri ñim srøig kurrabelø, tintatøga pørig kømøtø, øsig wab Tiuswei Espiritutøga pøriilø. Kabe srug tambalmerayu pøriilø kømøtø, misaamerai manrømerayu pøriilø køn.

<sup>4</sup> Nambe iigwane Cristogurri Tiuswei merrab treeg kuitamab isua pønrrer. <sup>5</sup> Kabe nam namashib øyeegwan martrapteelø namdø tsabø marøbelø kua, chi arrubiibe namuinukkurri arrubig kui lataig inchib pønrrømøtø, nam øyangatig tsabøtø marøb pønrramig arrubiibe Tiusweinukkurri arrubig køn. <sup>6</sup> Incha Tius nøtøwei namune tru srøig acuerdo marigwan nam sølgandø marøbelø kønrrai mara pønnsraig køn, tru acuerdo merrabsriig maig maramigwan martraim pørigwan kømøtø, tru Espíritu Santoiwan. Kaguende tru maig maramigwan martraim pørigwan mormíigweimbe kwamigwan srua arruben, trune Espíritu Santobe tru srøig øsig kømigwan tranøbig køn.

<sup>7</sup> Inchen tru maig maramigu marøptøga pønrraig kwamigwan srua arrubig, srug tambalmerayu pørikken tørguegwalmabig køptø, Israel misaamerabe Moiséswan malauguen ashchab kaimaig købig køn, nui malø tørguegwalmabig køben, tru tørguegwalmabiibe kwab yaindøgucha. <sup>8</sup> Inchen tru øsig kømigwan srua arrubigwan marøb pønrraig tru Espíritu Santoimbe, ¿kan treetøguen kønrrab kømø, maig tørguegwalmabig kuaasamø? <sup>9</sup> Inchen tru maig maramigwan marøptøga pønrraig misagwan kaigyu pønrrønrrai kørrømara pasrøbikken treeg tørguegwalmabig kuibe, tru marøptøga pønrraig misagwan Tiuswei merrab chi kaig kømeelø lataig tabig kønrrai marøbiibe, ¿kan treetøguen kønrrab kømø, mas purø tørig tørguegwalmabig køn! <sup>10</sup> Kaguende truig tørguegwalmabig lataig kuikken tru iig purø tørguegwalmabiibamara ashene, truiibe chi tørguegwalmabig kømøn. <sup>11</sup> Inchawei tru tørguegwalmabig kwab ibikken kan treeg tørguegwalmabig tøgaig arriibe, tru mana pinømø pasrabig pasrønrrabiibe ¿mas maig tørguegwalmabig

kuaasamørra!

<sup>12</sup> Inchawei tru tøgagønrrurmab isuigwan nam tøgaguen pønrraig køppe, nambe chi kørmeø maig tamigwan tøgandø waminchibelø ker. <sup>13</sup> Kabe tru Moisés lataig inchib pønrrømer, tru Israel misaamera nui malau tørguegwalmabig kwab arrubig yandø patsi ashmønrrai, malø kasraitøga kasrøb lataig. <sup>14</sup> Inchendø nømui turmerayube yandø chi wamindikken kebyainameelø murig misriilø kua, møin kwalømgatig tru merrabsrø Tius acuerdon marig købigwan leben, chi tainguen mørmeelø køn, tru malø pinøgasrøb pasrabiitøwei pasrabig pasraikkurri. Kaguende tru pinøgasrøbigwane Cristotøwei kerranrrun. <sup>15</sup> Incha møin kwalømgatig tru maig maramigwan martrai Moisés pøriilan asiimørig, tru maløwan pinøgasrøbig lataig pasrabiibe nømui manrrømerayube kasrain pasran. <sup>16</sup> Inchendø møikkøben Señorweimay llirawa pasramisrene, tru pinøgasrøbig lataig pasrabiibe nuinukkurrimbe kerraig kønrrun. <sup>17</sup> Kaguende Señorbe tru Espíritu kua, Señorwei Espíritu chu pasrøbene, Tiuswei merrab kemalamig truyube chigucha iløsrkønrrabiibe chi kaagøn. <sup>18</sup> Inchawei nambe mayeeløba maløwan chi kasra kømø lataig ashib pønrrabeløbe, kan espejo latailø ker, Señorwei tru tørguegwalmabigwan kegurnabelø, nø maig køben nam treeløtøwei misrøb, katøguchinguen, katøguchinguen tørelø misrøb amber. Treebe Señorweinukkurri arrubig køn, tru nø Espírituinug.

#### 4

##### *Jesucristoimburabigwan eshkabelø*

<sup>1</sup> Inchawei nambe Tius namun lastima asiitøga i tru marøb pønrramigwan tøga pønrraig køppe, nambe chi kullaarab melømer. <sup>2</sup> Pøs chigøben ke kørikken kønrrapteelø søratø mariilane nambe yandø wendøbasrar



ker, s̄arat̄o larr̄o m̄og isua mar̄ob p̄onrr̄om̄owei, Tiuswei wamwan lliska peemayt̄o mar̄ob p̄onrr̄om̄oweingue. Treeg mar̄ob p̄onrr̄om̄ot̄o, tru newan ciertonigwane maig kuigwan t̄organd̄o kenamar̄ob p̄onrraikkurri, nam tabel̄o kuigwan namashib kenamar̄ob p̄onrrer, maya misaamerai isub kebachib pasrabigu ka inchib pasr̄omugumab isumig kaanrrai Tiuswei merrab. <sup>3</sup>Inchen tru tabig sr̄o wamwan nam eshkab kusrenanig kat̄ogucha pin̄ogasraig lataig chuḡui m̄oriim̄ig k̄orr̄omisr̄oppe, tru yand̄o pinab pinamnuumay amrrabelaimbe pin̄ogasraig lataig k̄orr̄omisran. <sup>4</sup>Kaguende tru m̄oin kwal̄om yu pirau tius, tru nugwaimandziibe, tru chi k̄oremeelane n̄om chiḡui m̄oramig isubig t̄ogaḡuigwane chiḡui m̄ormeel̄o k̄onrrai kasa pasrin k̄on, tru Cristoi t̄orguegwalmabigwei tabig sr̄o wam t̄orbilabigwan n̄om nebua ashm̄onrrai; tru Cristobe Tius maig k̄oben, truig k̄on. <sup>5</sup>Kaguende nambe namuimburabigwand̄owei eshkab kusrenanm̄ot̄o, Cristo Jesúsbe mayeelaim pala n̄o ashib karub pasrabig k̄on cha eshkab kusrenan̄obel̄o ker. Kat̄o nambe Jesucristoyasig ñimuimbe ka karuind̄o melabel̄o ker. <sup>6</sup>Kaguende: “Tru l̄ost̄oyugurri t̄or pil̄onrrain” cha, trenchib Tius n̄ot̄owei namui manrr̄omerayu nui t̄ort̄oga kebin k̄on, tru Tiuswei t̄orguegwalmabig Jesucristoi malau pilabigwan nebua asam t̄orwan namun tranig k̄onrrai.

### *Chiḡoben tr̄omb̄oig puingucha mur p̄onrrab*

<sup>7</sup>Inchend̄o nambe iig tru pur̄o tabigwane namui asr kan pir̄o k̄ots̄o lataigut̄o t̄ogaguer, tru iig maramburab mar̄obig pur̄o nuig tabiibe namuin k̄om̄ot̄o, Tiuswein kui kenamartrab. <sup>8</sup>Chiyut̄ogucha chine chine pui melamig nebuingucha, ke truyut̄o tambal ambagucha war̄omer. Ke kan chindamerab isumig pui mel̄obend̄o, yand̄o ke kaimamuitamappe isuil̄ogucha mel̄omer. <sup>9</sup>Namun kaig

marøb amrruindøgucha, namundø elatsiilø melømer. Pøtiitsiiløbe kuinabendø, kerriguwan pinisailøbe kømuintanan. <sup>10</sup> Inchawei nambe chu ambuptøgucha, namui asru Jesucristo kwaigwane tōga amøner, katø Jesucristo øsig waikkucha namui asru kenamisrtrai. <sup>11</sup> Kaguende nam øsig pønrrabeløbe Jesucristogurri chu urastøgucha ke kwaitø, kwaitø melamig nebutan, namui ka pinønrrab asru Jesucristoi øsig pasraikkucha kenamisrtrai. <sup>12</sup> Inchawei namuinuube kwamig marøb pasrøben, trune ñimuinuube srøig øsig kømig marøb pasran.

<sup>13</sup> Tiuswei wamwan pøriguma trenchibig køn: “Kørewa, treekkurri waminchar” cha. Pøs namgucha namui isubigwane Cristoinug treetøwei pasra pønrrøwa, treekkurri nambe kørewa, Tiuswei wamwan waminder. <sup>14</sup> Pøs nambe ashibelø ker, Señor Jesúsuan kwailai utugurri Tius tru katøle øsiirangarubiibe, namungucha Cristo Jesúsba tru kanbalatø pønrraikkurri kusrua, Tiusbe nui merrap-tøwei nam ñimba kanbalatø pønrramig kønrrai mar-trab kui. <sup>15</sup> Pøs kerrigu øyeeg pub arrubiibe ñimuyasig tab kønrrain køn, tru ka yandø tab indig misagwan katøguchinguen, katøguchinguen nebub ibene, ‘ungwa, ungwa’ tameløgucha nuramburab nuranrrai, Tiusweyasig maya nuguen tab kønrrai.

<sup>16</sup> Inchawei nambe chi kullaaramer. Kaguende namui asrbe patsab yaingucha, namui umbube kwalømmørig, kwalømmørig srøig misrøb inrrun. <sup>17</sup> Pøs nam chigøben puinab melamig ka petø pureb arrubig, kan yangucha murig køtanmab isub mur kui melaibe managuen patsønrrabgaig kan törguegwalmabig maya nuibaguen øyeeg lataig køn cha, kemesra trendamgaig tabigwan tōgaig arrubig køn. <sup>18</sup> Kaguen nambe namui kaptōga asigwan asha pønrrømøtø, chi nebua asiimífgwan asha pønrrer. Kaguende kaptōga nebua asiiløbe ka purainrrabitøwein

køben, trune tru kaptøga nebua asiimeeløbe managatig-  
weyelø køn.

## 5

<sup>1</sup> Pøs nambe yandø ashibelø ker, yu pirau nam øsig pønrraig tru namui asr ka petøweindiig kan rancho-unø mara pasrindø lataig, yandø minchib patsindøgucha, katøgan srø asr purø tab ya lataig, mu møguelø taska mari ya kømøtø, srømbalaserø managuen patsønrrabig kømíig Tius tranig tøgagømigwan. <sup>2</sup> Inchawei nambe yu pønrrappe, tru srømbalaserø kewa purramitøga pinøbuliilø kømigwan, mana kønrrermab truba truba nuisrab isubelø ker. <sup>3</sup> Treebe namune srø asrtøga kenanen, nambe yandeelø asr chigar kømø, tøgar kømønrrun. <sup>4</sup> Inchawei i asr kan carpa ya lataigu nam øsig pønrrabeløbe larrø tab kømui, truba truba nuisrab isuig melabelø ker. Pøs namune kwamuinrrabna køtan nam tøga pønrraig asrwan trubalatø srøig itøguenniilø kømøwatøbe, tru yandø pinab patsønrrabigwane tru srøig øsig kømibe yandø nøtø kerriguwan pinabgasra pasramisrtrai. <sup>5</sup> Inchen namun øyeeg pønrramig kønrrai marøbiibe Tius nø køn, tru treeg kønrrai Espíritu Santon katsig pasra namun tranøbguen inchibig, tru tranrrab kørømisrigwan kutøguewan tranrrab kui asamig kønrrai.

<sup>6</sup> Inchawei nambe chu urastøgucha chi isumø pønrrer, tru namui asru øsig amønippatøbe, Señorweim pulu kømøtø, nambe yabsrøndø pønrrabelø kui nebua asha. <sup>7</sup> Kaguende nambe amønippe, namui isubigwan Cristoinug pasriitøgatø amøner, namui kabrrawa nebua ashagurrin kømøtø. <sup>8</sup> Inchendø nambe treeg kønrraitamab chi isumø pønrrer, masken namune asrugurri tarømisra ambinrrabna køtan, Señorba kanbalatø purrønrrab amrrab. <sup>9</sup> Inchawei namui asru øsig pønrrøwa

lata, asrugurri tarømisra amba lata Señor nø tab kui mørøb wanrrai marøbelø kømig namuimbe truig køn. <sup>10</sup> Kaguende nambe tru maig maramigwan Cristo asha marøb wainug mayeeløba kemalamig køn, namui asru amøña tabig marig kuin kui, kaig marig kuin kui maig marigwan nam møitøgucha truburø utønrrab.

*Tiusba katøle tab kørømisramig*

<sup>11</sup> Inchawei Señorwan mandø kørig tøga pønrramigwan nam ashibelø kuig køppe, misaamera Señorwan kørenrrai inchib melabelø ker. Pøs Tiuswei merrabma nam mailø kuigwan tørgandø kenagúibe, katø ñimui isub kebachib pasrabigugucha treetøwei tørgandø kenagønrraimab isur. <sup>12</sup> Kabe nambe namasiitø katøguen ñimui merrab 'truba tabelø ker' chib pønrrømøtø, ñim namgurri tab kui mørøb kasrag pønrramigwan tøgagønrrai treeg isua inchib pønrrer, ñim tru mandø lètamigwan tøgagønrrai, tru manrraugurri isua kømøtø, ka palatø treeg maranmab ashchaindø møg inchib chib pønrrabelan. <sup>13</sup> Namun 'locos køn' tainab pønrraibe, Tiusweyasig køn. Inchen maig pønrramigwan chugúi møra pønrraibe, ñimuyasig køn. <sup>14</sup> Kaguende Cristoi undag købiibe namune martrai trawaguchibig køn. Pøs iigwan nam isua ashene: Cristoma kwappe, mayelaimburø kwaig købene, treekkurri mayeeløba kwaig køn. <sup>15</sup> Inchen Cristobe kwappe, mayelayasig kwaig køn, tru øsig amøñibeløbe ka nømuyasiitøwei øsig amøñimøtø, nuyasig amøñibelø kønrrai, tru kwawa, katøle nømuyasig øsiirabigwei.

<sup>16</sup> Inchawei nambe yandø møingurrimbunøbe mundøgucha yu pirauelø isuimay ka treetø isua ashib pønrrømeelø ker. Pøs nambe merrappe Cristone yu pirauelø isua asimay ashibelø kuatøgucha, møimbe yandø treetø nebua asha tøga pønrrømer. <sup>17</sup> Inchawei

møikkøben Cristoinug pasrabiibe, yandø nøbe kerrigu srøig køn; merrabiibe yandø chab puraiben, møimbe yandø kerrigu srøig marig peemayig køn. <sup>18</sup> Inchen kerriguba øyeeg arrubiibe Tiusweinukkurrin køn. Pøs nam kailø kua nøbatøwei tab kørromisramigwan Cristo Jesúskurri treeg kønrrai mara, kailø kua, Tiusba tru tab kørromisram wamwan nam marøb pønrrønrai, nø tranig køn. <sup>19</sup> Tru wambe iig køn: Tiusbe nøbatøwei Cristogurri pirau maya misaameraba kailø kua, tab kørromisramigwan marøb pasraig, nømui chi kaig mariilan ulø payrrab isua ashmøtø. Tru øyeeg nøba tab kørromisram wamwane namun waminchai trana pønsraig køn. <sup>20</sup> Nambe Cristo munchiyu, misag utu Cristo nø waminchib pasrab lataitøwei nui wamwan waminchib pønrrønrai pønrsailø ker. Namgurri Tius nøashib treeg maray chib pasrab lataitøwei, nambe Cristo munchiyu ñimun tiusmanda øyeeg martrunrigay tamønrrun: ¡Tiusba tab kørromisramigwan maray! cha. <sup>21</sup> Cristobe chigucha chi kaig marig chigaigwan, Tiusbe namuimburø nune kaig marøbig kui lataig treeg mara pasrig køn, nam kaig marmua lataig pønrramig kønrrai Cristogurri treeg martrab.

## 6

<sup>1</sup> Nam Tiusba marøb pønrrabelø kuig køppe, ñimune øyeeg marøb kørrunrigay chinrrab, Tiuswei tru ka yandø tab indigwane ke chi martraamøbendø uta tøgagømøtay cha. <sup>2</sup> Kaguende nui wamwan pørigube Tiusbe trenchibig køn:

“Yandø tru purugum kwalømmera puim pasrøben, ñun mørig køn cha.

Kaigyugurri wesrailø køm kwaløm puim pasrøben ñun purugúig køn” cha.

¡Mõi yan køn, tru tabig purugúigwan utamibe! ¡Mõi yan køn, tru kaigyugurri webambam kwalømbe!

*Pablon chine chine nebul arriilo*

<sup>3</sup> Mugøben Tiuswei tabig srø wamwan kaashib, nam marøb pønrraigwan kaig køn chib wamindig kømønrraimbe, nambe kaig marøb mungucha srurrengwan-garub pønrrømer. <sup>4</sup> Masken treeg inchimøtø, nambe chiyutøgucha Tiusweiwan marøb melabelø kui asiilø kønrrab treeg kenamarøbelø ker: chu uraskucha elachimøtø, marøbig marøb melamigu lata, chine kaig pub arrubigu lata, chine palai mørøb, isui melamig arrubigu lata, <sup>5</sup> ichagutsiilø kømig nebui lata, kailan pønsrai yau keerig pønrramig nebui lata, kanbalatømisra kaig martrab namig kurrøben treegu melamig nebui lata, maramga murelan marøb melamig nebui lata, kibguen kimø melamig nebui lata, chigucha mameelø puraambub melamig nebui lata, <sup>6</sup> chi kaig marmø chishig amønnamigu lata, nebua ashib ambigu lata, chine indindøgucha tam-may ka melabig melab, tab inchibelø kømigu lata, Espiritu Santo namba pasraigu lata, nam ka inchib kømø, cierton undaguelø kuigu lata <sup>7</sup> cierton wamindamigwan treeg waminchibelø ker. Tiuswei maramburab marøbiitøga marøb, tru chigurrimbunø tabig sølgandø marøb pønrraitøgabe nambe kusrmayba, atsimayba srua kwayab pønrrer, kan suldau kwayab turiamig kusrmaybe espadan atsimaybe escudon srua kwayab pasrab lataitøweingue. <sup>8</sup> Kanmaywane truba tab indinab, kanmaywane maig købash indinab, kanmaywane truba tabelø køn chib wamin-dinab, kanmaywane larrø kailø kui mara wamin-dinab, maig kuigwan nam cierton waminchendø, larrø may wamincha isapteelø kui marinab, <sup>9</sup> nambe mumera kui nebua asiilø kuinabendø, asiimeelø kui lataig tøgagúinab,

yandø kwawa pinanmab asha tøgagúindøgucha, øsig amønibig amønibelø, trømbøig ichabetiilø kuinabendø, kwamø ka øsig amønibelø, <sup>10</sup> truba isuilø meløbendø, purø tab kui kasrag pønrrabelø, larrø waachamera kuinabendø, misag truba nørrøwan tabigwan tøgagømburab tøgagønrrai marøbelø, chugurringuen kømeeelø kerrigu chiga latailø kuinabendø, kerriguh tøgar treelø kuinatan.

<sup>11</sup> Nambe, ñim corintosreelan, maig wamindamigwan tørgandø treeg waminder. Nam ñimuimburab isumibe namui manrrømerabe ke kurindø pasran.

<sup>12</sup> Ñimuimburab nam isumibe chugatikkucha kurin pasrøben, ñimweinrre kasrøb tøgagøn namuimburab.

<sup>13</sup> Ambugurri igurri lata treeg kønrraimab isua, kan nai ureg kui lataitøwei nabe ñimune trenchar: ¡Ñimui manrrømerangucha treetøwei kura tøgagørrunrrigay! cha.

### *Nambe øsig wab Tiuswei ya ker*

<sup>14</sup> Ñim Tiuswan køreløbe Tiuswan lata køremeeløbabe lincha maramgaigube chi lincha maramig kømøn. ¿Kaguende tru tabig sølgandø maramiba, sølgandø kømø mariibabe chincha kandø kønrrab kø? ¿Katø løstiiba, tørbabe chincha trubalatø kønrrab kø?

<sup>15</sup> ¿Cristoba, Belialbabe chincha kandø isunrrab kø? ¿Criston kørebiiba, Criston køremíibabe chincha kandø isub pønrramdiig kønrrab kø? <sup>16</sup> ¿Katø Tiuswei yaba, taska mari tiusmerababe chincha trubalatø kønrrab kø? Kaguende nambe tru managuen kwamø øsig wab Tiuswei ya ker. Pøs nøbe trendaig køn: “Nabe yandø nømuinug pasrabig pasrab, nømui utu uñib indamønrrun cha. Nabe nømui Tius køben nømgurrimbe nai misaamera kønrrun”

cha.

<sup>17</sup> “Inchawei treeg købene:

Tru kaig marøb misaamerai utugurrimbe webamba,

yandø nøørømisray” cha,  
 Señorbe nui misaameran trendan.  
 “Chigøben køsøngømdiigwane katøramøtay cha.  
 Pøs marmubene, nabe ñimun utamønrrun” cha.  
<sup>18</sup> “Incha nabe ñimuimbe møskai misren,  
 ñimgurrimbe naimbe nai nusrkalø,  
 nai nimbasrmera misrtrabguen” cha,  
 Tius Newan Maramburab Marøbiibe trendan.

## 7

<sup>1</sup> Inchawei ñim, nai undaarailø, tru Tius tranrrab misra kørrømisriilan tøgäbe, namui asru lata, namui es-pirituyu lata, kaig marig køsøngønrrapteelan kerriguwan chish misrkun, Tiuswan køriibala pønrraigu kerriguwan nuindø newan tabelø kønrrab.

*corintosreelø yandø mas kaig marmønrrab isua mørøb*

<sup>2</sup> Namun ñimui manrraugurri isua utørray chinrrab inchar. Nambe møigwangucha ñimun sølwan marmø kalø mara pønrrømøwei, kaig marøb ñimun møigwangucha mindisha kørørmarmøwei, kabe nam ñimgurri nam tøgamisrmøwei indig køn. <sup>3</sup> Nabe iigwan ñimun øyeeg chippe, ñimbe øyeeg kailø køn chinrrab kømøtø inchar. Nabe yamba trendaig kuig køn, nambe ñimune namui manrrau tøgä pønrrer cha, øsig amøña lata, kwamig kui lata ñimun namui manrrau tøgagønrrab. <sup>4</sup> Nabe ñimune chi isungailø kui isua pasrab, chiburø køben ñimgurri na truba tab kui mørøb pasramigwan tøgagøb inchar. Nan truba tab kønrrai mari pasrar, chine isui pønrramig puindøgucha, kasrag købigwan tøgagømburab tøgä.

<sup>5</sup> Nam Macedoniasrø puabe, namui asrwane kan pishindø tabguen israb tøgagømig nebumíig køn. Treeg kømøtø, chiyutøgucha ka isui melamitø, isui melamitø ar-rubig køn namune, namuim pøtøgatanbe chinetø indinab



melamig arruben, namui manrraube korig isub melamig. <sup>6</sup> Inchendø Tius tru larrø kullaarai isui melabelan isui inchimønrrai marøbiibe, Tito arriitøga namune truba tab kui melønrrai marig køn. <sup>7</sup> Katø Tito arrikkurrindø kømøtø, nøgucha ñimgurri truba tab kui mørøb pasramigwan utikkurrimba køn. Nøbe namun wammørøsrkøtan, ñimbe nan truba ashig kui melaigwanba, ñim tru merrab kalø marig købigwan isua møra kappin kørøgaigwanba, ñim naimburab truba truba isub melaigwanba. Treekkurri nane katøguchingen kasraaranrrai martan.

<sup>8</sup> Pøs na ñimun tru kilga pøra øriitøga ñimun truba isuilø kørømisrtraï marig købigwane nane chi isumøtan. Pøs tru urasbe nane isubwei indig køn, kaguende tru na kilga pøra øriibe kan maya yanagatiitøbe ñimun isui melønrrai marøbwei inchen. <sup>9</sup> Møimbe nane kasrag køppe, tru ñim truba isui melaigwan, trunun isua kasrag kømøtø, tru ñim truba isui indiibe ñimui kaig mariilan isua møra, Tiusweimay lliranrrai marikkurri nane kasrag køtan. Pøs ñim truba isui inchib pønrrappe, Tius trendø treeg kønrrain køben kuig kua, nambe ñimune chigucha chi kalø punrraimbe marmuig køn. <sup>10</sup> Tius maig palain køben nam trumay isui inchib pønrraibe ñimui kaig mariilan isua møra, Tiusweimay lliranrrai marøbig køn, kaigyugurri wesrailø kømigweyasig trembe kaabashmøtømab isumig chigaikke. Trune isui inchib pønrramig arrubig yu pirauibe, kwamibe tøgäig arrubig køn. <sup>11</sup> Tius maig palai inchen, ñim trumay isui inchib pønrraigwan ñimguen asay: ñimuinug truba marøg kui inchib pønrramig arrub, øyeekkølig kalø marøbrain køn chib tør marøb pønrramig arrub, kalø maren namig isub pønrramig arrub, køriibala pønrramig arrub, truba truba asinrrabna kui inchib pønrramig arrub, tabigweimburab ke chinsraatø inchib pønrramig arrub, kaig marøbigwane

møra meganrrai marøb pønrramig arrub, treeg arrin køn. Inchawei kerrigu øyeeg purayaigu ñimbe chi kalø mara pønrrømuin kui kenamarøb pønrran. <sup>12</sup> Inchawei tru kilgawan pørøppe, tru sølwan marmø kaig marøbigwan isua, truikkurrim pørmøwei, kabe tru kalø marinabigwan isua, truikkurrim pørmøwei indig køn. Treeg kømøtø, tru ñim namuimburab truba isubelø kuigwan ñimui utu Tiuswei merrab nebua asig kønrrai indig kuig køn. <sup>13</sup> Inchawei nambe chi isumø tab kui pønrramig kønrrai mariilø ker.

Nam tru treeg tab kui pønrraig kømnetø, Titon truba truba tab kui pasrai ashabe, nambe larrø tab kui truba kasrag pønrrer. Kaguende Titone nui isubigu katøle truba tab kui mørøb pasrønrrai, ñim søteelømisra purugúin køn. <sup>14</sup> Pøs ñim corintiosmeraimburab truba tab kuim pasrar chib Titon na waminchib pasraigwan, chi køriimisa kørømisrmur. Nam ñimun kerriguba chigøben wamindiima chi isa wamindig kømug køppe, ñimuimburab truba tab kui mørøb Titon nam waminchib pønrraikkucha treetøwei isa kømø wamindig webyan. <sup>15</sup> Inchawei Titobe mømbe ñimune katøguchinguen undaguig køn, tru nø maig karuigwan ñim mayeeløba mørøb, nun utabgucha, køriibala ke itønab utig købigwan isua. <sup>16</sup> Chiyutøgucha ñimbe chi isumgailø kuimba mayanguen nane tab køtan.

## 8

### *Merø kømø, tranamburab tranigwan waminchibig*

<sup>1</sup> Trube, mømbe ñim nai nunelø, wammøra kønrrai inder, tru Macedonia pirausrø iglesiameran Tius nui ka yandø tab indigwan øyeeg tranigwan. <sup>2</sup> Yeeg chine kaig nebuinab melamig pub arrubig ututø, nømui kasrag købigwan kasrag kømburab tøgagúiba, larrø chuguringuen kømuilø melaibabe, merøbala kømø, tranamburab tranøbelø kønrrai marin køn. <sup>3</sup> Inchawei nabe

maig kuigwan wamindamønrrun, tru nòmun maig purugumdiig køben treeg purugua, nebumgaigwanguen nebua tranig køn cha, nòmun mu tranrrai indig kòmøtø. <sup>4</sup> Pøs namune truba rugabelø køn: “Tru Jerusalén-srø Tiuswei misaameran namgucha truilan tōga purugúig kønrrai treeg marbashibsrumøgue” chib. <sup>5</sup> Incha nam treeg martraitamab isuigwandø marmøtø, nømbe Señorweyasimerrig pønrrønrrab nømashib pønrramisra, trugurrimbe namun treetøwei pønrrønrrab pønrramisrøbelø køn, Tius maig kønrrain køben treeg. <sup>6</sup> Inchawei nambe Titone øyeegwan martrunrrig cha waminchibelø ker: “Iig truba tab indigwan ñi maig marøb pølbasriibe, katø treetøwei tru corintiosmera jerusalénsreelayasig tranigwane tabig marøb patsøgørrunrrig” cha. <sup>7</sup> Pøs ñimbe isubigwan Jesucristoinug pasra tōgagømigu lata, Tiusweimburabigwan nebua ashib waminchib ambigu lata, Cristoi maramigwan tab asha maramigu lata, ñim namuimburab undag købig tōgagúigu lata, chiyutøgucha ñimbe ya merrabguen melaig køppe, lastima asha tranøbelø kømigu chigucha iyu treetøwei merrabguen webamrrab inchigay.

<sup>8</sup> Maig martrain chippe, ke kandø chibig lataig nabe treeg karua pasrmur, treeg kòmøtø, ñim undag købigwan cierton tōgagúitashchab ashchab inchar, katøganeløma treeg tab marøbelø køn cha trunun eshkab. <sup>9</sup> Kaguende ñimbe namui Señor Jesucristoi tru ka yandø tab indigwan nebua ashibelø køn, nøbe chigucha chi palømiig tōgaig købendø, ñimun undag købiitø larrø waacha misra, tru nø treeg waacha misriitōga ñimun Tiusweimburabigwan chigucha chi palømeelø kønrrai marigwan.

<sup>10</sup> Incha iigube nabe ñimun øyeeg maramdiig køn chinrrab inchar: tru purugunrrab tulisamigwan ñimbe marig pilawei tranamigwan ñimmerrig tranøb, katø

trutø kømøtø, maramigwan ñimwei isuig kuig købene, <sup>11</sup> trube, ñim pølbasra marigwane mømibe tabig marøb patsøgamig køn cha. Tru ñim purugunrrab indamigwanma ñim ke martraptø pønrraig køppe, trube, tru maramigwane treetøwei marøb patsøgamdiig køn cha, ñimun maig nebubendø. <sup>12</sup> Kaguende møikkøben ke tranrrab isua, mayanzhig tranamdiig køben treeg tranigwane Tiusbe chi kashmø utabig køn, ke chugurrin kømuingucha tranrrai inchimøtø.

<sup>13</sup> Inchendø nabe øyeeg chippe, kaneløbe chairailø kørromisren, ñimbe purugub meløwa, ke chugurringuen kømui inchib kønrrain kømøtø, <sup>14</sup> mumaytøgucha lata kønrrai inchar. Møin kwaløm ñim chigucha chi palømíig uncha tøgagúibe nømun purugumig køben, katøwan ñim palai meløbene, tru nøm uncha tøgagúibe ñimun purugumig kønrrai. Trumaybe mumaytøgucha lata kønrrun. <sup>15</sup> Tiuswei wamwan pørigu maig taimbala: “Nu tulishibiibe ke unchagøm tøgagømøwei, lamøtø tulishibiibe palappuin kømøwein køn” taig.

### *Titon Corintosromay karua ørøb*

<sup>16</sup> Namui Tiuswan ‘mayanguen ungwa, ungwa’ chinrrab, ñimuimburab na isui lataitøwei Titoi manrraugucha isunrrai pasrigwan. <sup>17</sup> Pøs na nun Corintosromay ya, øyeeg maramdiig køn cha, na wamindigwan ka møriitø kømøtø, nøbe maramigwane ke marøg kuindø megaig kuig køppe, nøshib treeg martrab isua, ñimuisromay yan.

<sup>18</sup> Incha kan nuneg, Tiuswei tabig srø wamwan eshkab kusrenanøb pasraigu, chu iglesiameratøgucha nune truba tabig wamindinabigwan nambe Titoba lincha inrrai ører. <sup>19</sup> Incha katø treetø kømøtø, tru iglesiameragucha nun lawa wesraig kuig køn, tru jerusalénsreelai tab indig purugúigwan nam srua amben, nø namun lincha attrai.

Nambe Señorwan maya nuguen tab indig kørnraimba, nam purugug kui pønrraigwan katøganelan kenamartrappa, tru an tulisaiwane nam asha marøb pønrrabelø ker. <sup>20</sup> Mugøben namun 'øyeeg kalø marøpteelø køn' tainab pønrramig kømønrrai inder, tru yeeg nørro keta traniilan nam asha marøb tøga pønrrønrrai tranigwan. <sup>21</sup> Kaguende nambe chiwandøgucha maig maramigwan sølwan martrab inchib melabelø ker, Señorwei merraptø kømø, misaamerai merrabgucha treetøweingue.

<sup>22</sup> Incha nambe katøgan namui nunewan nømun lincha inrrai ører, nui mariiløyu chiyugøben ke martraptø pasrabig kui katø katø treeg møg kui nam asigwan. Incha møimbe nøbe katøguchinguen tru maramigube ke martraptøweim pasran, ñim chi isumgailø kui nø truba isua tøgagúikkurri. <sup>23</sup> Pøs Titobe, naimbe nan lincha megabig, katø ñimui utu chi maramigu purugub megabig, treeg køn. Inchen tru katøgan lincha ambub nuneløbe, tru iglesiamera karua øriilø, Cristoyasiibe maya nuguen tabig kønrrai pønrrabelø, nømbe treelø køn. <sup>24</sup> Inchawei ñimbe tru møguelane truba undaguelø kuin kui ashchai kenamartrigay, iigwan tru iglesiamera mayeeløba asha kønrraingue. Katø na ñimuimburab tab kui mørøb pasraibe chigurrin kui ashchai inday.

## 9

### *Cristogurri nunelan purugumig an tulisai*

<sup>1</sup> Inchen tru Tiuswei misaameran purugumig tru an tulisamigweimburappe ñimune chi pøramikken palømøtan. <sup>2</sup> Pøs tru purugumigwane ñimbe purugunrrab ke muniitø pønrrabelø kui nabe ñimune ashibig kur. Incha nabe treegwan ñimuimburab macedoniasreelai utu truba tab kui waminchib pasraig køn, ñim acayasreeløbe tru tranamigwane marig pilasrøwei tranrrab chab tamara

kuig købene. Inchen tru maramigwan ¡katø! marig kørrømisrtraí isua ñim marøb kuibe, nõm tru macedoniasreelø truba yamelø treetøwei martrab isunrrai indin køn. <sup>3</sup> Øyeeg kuindøgucha tru ñimuimburab nam øyeegu truba tab kui mørøb waminchib pønrraibe, ka wamindiitø pureptinchibgunmab isua, i nunelan ørar, tru ñimuimburab na maig waminchib arrig, masken tamara kønrrai, <sup>4</sup> inchipa macedoniasreelø møiløgøben naba amrrub chi inchene, ñim chigucha marmø, pesan køben puinab melømønrrai. Pøs, kan treeg pubene, namune purø nu køriimisram nebunrrab køn, ñim chab tamara melaitamappa nam ñimun chi wammørøsrømøikkurrindø. Pøs, ñimune masken køriimisram nebunrrun. <sup>5</sup> Inchawei øyeekkurri, i nunelan ñimuisrømay merrab ashchab amrrai øramig nabe palai asig kuig køn tru purugumburab purugunrrab misrig købigwan tulisam purugua yandø ke chab tamara munig kønrrai. Trumay tru ñim purugumig tulisaiibe merøbala kømø, tranig kui asamdiig kønrrai, ke tranrrai inchendø, tranig kømøtø.

*‘Merø kømø, purugumigwan øyeeg maray’ chib wamindig*

<sup>6</sup> Incha ñimbe iigwan isua kuy: møikkøben ke kagømønrraindiig ellguabiibe, katø treetøwei kagømønrraindiig tulishinrrun. Inchen møikkøben ellguamburab ellguabiibe, katø ellmarigwan tulisamburab tulishinrrun. <sup>7</sup> Ñim møitøgucha tranamigwan tranøppe, ñui manrrau maig tranrrab isua tøgagúig køben, treeg tranamig køn, ke tranmuinrrabna købendø, tranmøwei, kabe ke treeg tranamig kuikkurrindø tranmøweingue. Kaguende Tiusbe kasraatø tranøbigwane undaguig køn. <sup>8</sup> Inchen Tiusbe maramburab marøbig køn chigurribunø tøgøgømigwan ñimuinug tøgøgømburab unchaguen tøgøgømig kønrrai, treeg maramig, chiyutøgucha ñim chi palabigwan chu urastøgucha palømø tøgagua, chigøben

tabig maramigu kerriguba ñim purugub kômig unch-  
aguen tøgagønrrai. <sup>9</sup> Inchawei Tiuswei wamwan pørigube  
trenchibig køn:

“Larrøbitchai tsurøb, waachameran tranøb indig køn cha.

Inchen nui tru tabig sølgandø maramibe managatig  
pasrabig pasran” cha

<sup>10</sup> Inchen Tius tru ellmarøbigwan yell tranøb, pirri  
manrrai tranøb inchibiibe, maig palabigwan tranøb,  
ñimui yellwan nørrø larrøbitchai marøb, tru ñim tabig  
sølgandø maramibe kan ellmarig misrøb lataitøwei  
nørrø larrøbichib inrrai martrun. <sup>11</sup> Trumaybe ñimbe  
chiyutøgucha chi palømig tøgagønrrai mariilø kønrrun,  
chiyutøgucha purugumigu merøbala kømø, tranamburab  
tranøbelø kønrrai. Inchen ñim tru purugúigwan nam  
nømun tranen, nømbe Tiuswan ‘mayanguen ungwa,  
ungwa’ chib kômig kønrrun. <sup>12</sup> Kaguende ñim øyeeg  
marøb kuibe Tiuswei misaameran chi palabigwan treeg  
purugúitø kørrømisrmøtø, Tiuswan ‘mayanguen ungwa,  
ungwa’ chib kømikkucha truba truba kønrrun. <sup>13</sup> Inchen  
tru ñim øyeeg purugúigu ñimbe numera kui asiilø  
køn. Katø nømbe Tiuswan truba tabig waminchun,  
Cristoi tabig srø wamyu pønrrøwa, truig maig taigwan  
ñim møra, truigwan kenamarikkurrimba, katø ñimbe  
nømun merøbala kømø purugub, katøganelø mayeelan  
treetøwei purugub indikkurrimba. <sup>14</sup> Katø nøm tru ñim  
purugúigwan utabeløbe ñimuyasig Tiusba waminchippe,  
ñimuimburab truba nu undaatøga martrun, Tius nui ka  
yandø tab indigwan tøgagømburab tøgagønrrai ñimun  
tranikkurri. <sup>15</sup> ¡Tiuswan ‘mayanguen ungwa, ungwa’  
chinrrab, wamindiitøgabe kan mandøguen tamgaig purø  
nuig tabig keta tranigwan!

## 10

*Pablo Tiusweiwan nø marøb pasraigwan chinchaingaig waminchib*

<sup>1</sup> Na Pablo ñimun øyeeg martrigay chib waminchar, Cristo tru purø tammayig kuitøgaba, purø tab inchibig kuitøgaba. Tru na ñimui malau pasrappe, chi tre chish waminchib pasrømiig køn tainab, trube, peesrøn pasrappe, maig tamigwan kelarrab, kelarrab trenchibig køn tainabig. <sup>2</sup> Na ñimun trenchinrrab inchar, na ñimuisrømay arrua, namun møiløgøsrøn ka namuimburaþtø isub yu pirau maig købashtiig amøñibelø køn chibelan kelarrab, kelarrab tamig tøgagúigwan tiusmanda ñimun trendamig kømønrrai inchunrrigay cha. <sup>3</sup> Pøs nambe misag kuinabwei inchendø, yu pirauelø maig kwayabelø køben, treeg kwayab amøñimeelø ker. <sup>4</sup> Kaguende tru chitøga kwayamig nam tøgagúibe, møguelain kønrrab kømøtø, truibe Tiusweinug maramburab marøbig, treeg køn, ni mumaygucha chindamga murelø nugwaimandzig pønsraig pønrrabelan pøtiitsamig. <sup>5</sup> Pøs truitøga nambe tru kusremburab kusrewa wamindiilanba, katø tru purab nørreelø isuilø misaamera Tiusweimburaþigwan nebua ashmønrrai sötø pasramisrøb kurrabigwanba pøtiitser, tru chigurrimbunø isuilane Cristo maig kønrrai inchen, treegu pønrrønrrai merrarrawa pønrsøb. <sup>6</sup> Incha ñim newan mørøbelø misra pønrramisrene, tru maig taigwan mørmeelane nambe møra melønrrai mara kørromarþrab pønrrer.

<sup>7</sup> Ñim kui ñimui kabyu maig kenagøben, ka palatø isua ashibelø. Møikkøben, isa kømø Cristoin kurmab isua pasrøwabe, trube, iigwan isua kømig køn: Nøma Cristoin kuig købene, namgucha Cristoieløtøwein kuin kui. <sup>8</sup> Maig maramigwan nam karub tøga pønrrønrrai Señor namun trana pønsraigwan, iigwan na purø



møg inchib waminchib pasrab lataig indinaindøgucha, nabe chi korig misrabe pasrømumønrrun. Pøs tru maig maramigwan karub pønrrønrrai Señor namun trana pøn-srøppe, ñimun mindishaguen kørømartrain kømøtø, Tiusweimburabigu nørøram purugunrrainguen tranig kuig køn. <sup>9</sup> Pøs na kilgamera pøra, ñimun truiløtøga ke kwaarøsrøg køb lataikkucha indig kømønrrai inchar. <sup>10</sup> Pøs mõiløbe trenchibelø køn: “Tru Pablo kilga pøriiløbe purø murtø tranøbig, ke menrra mur waminchibig treelø køn cha. Inchendø nøashib namba pasrappe, chi tren-gatig kømøøllig, waminchibgucha chi may waminchimíig køn” cha. <sup>11</sup> Pøs tru treeg chibeløbe, trube, iigwan isua kømig køn: nam yabsrøm pønrrøwa, kilga pørigu mandø chib pørøbeløbe, ñimui utu amrrua, marøbgucha treetøwei martrab kui.

*‘Nuig misrøb møg inchibig køn’ taigwan løtab*

<sup>12</sup> Pøs nambe tru nømasiitø ‘truba tabelø ker’ chib pønrrabelø truilø mailø køben, namgucha nømbe latailø ker chib pønrrømøwei, kabe nøm maig tabelø køben namgucha treeløtøwein tabelø købraitashchab inchib pønrrømøwei inder. Trune truiløbe nømasiitø kangurrin kangurri mayangatig køtashib, katøganelø lataitøwein købraitashchab inchib pønrrappe, chugúinguen mõrmeelø køn. <sup>13</sup> Inchen nambe møg inchib ke purabgucha waminchib pønrrønrrab kømøtø, Tius namun mayangatig martrai pønsraigwan nambe treegwandø marøb pønrrer, katø ñimuisrøngatikken pumig kønrrai tranigwan marøb. <sup>14</sup> Kaguende nambe namuinukkurri webunagucha pønrrømer, pøs nam ñimuisrø pumuig kuig lata. Pøs nambe ñimuisrøngatig Cristoi tabig srø wamwan nammerrigwei srua amrruig købig køn. <sup>15</sup> Kabe katøganelø nøøreelø marigu kebamba, purab møg inchib waminchibgucha pønrrømer,

namuinukkurri webambub. Masken treeg kòmøtø, ñimui isubigwan Jesucristoinug pasra tøgagúigu katøguchi nòrrørab amrraimab isua muniirab meler, namui maramig ñimui utube nòrrø larrøbichib inrrai,<sup>16</sup> Tiuswei tru tabig srø wamwan ñim corintoelainukkurri mas yabsrønguen eshka kusrenanig kònrrai; peenug katøganelø kebamba marinug trusrø nam kebuna møg inchib waminchib pønrrømønrrab.

<sup>17</sup> Inchen møikkøben nui misrøb møg inchib waminchib pasrag købene, nòasiitø kòmø, Señorweiwane tab kui mørøb tabig waminchib pasrøbash. <sup>18</sup> Kaguende nòasiitø ‘truba tabig kur’ chib, nuimburaptø waminchibigwan tabig kui asha kørømarig kònrrab kòmøtø, tabig køn cha, Tius nø wamindig, trube tabig køn.

## 11

*Pabloba, ‘Cristo nòashib karua øriilø ker’ chib ka isatø inchibeløba*

<sup>1</sup> Ke na chugúí mørmíig lataig na mayandø wamincha mørtrab ñim trunun ka awentaimbe kòtan. Pøs na treeg indingucha ñimun ka awentarray chinrrab inchar. <sup>2</sup> Kaguende ñim møigweyasig pønrrappe, ke trugweindø kònrrai, na treeg inchib truba isub pasrappe, Tiusweinukkurri arrubiitøga treeg inchib pasrar. Muba kasharanrrab misrabe, truibatø kasharanrrai nabe ñimun treeg mara tøga pasrar, trube tru Cristoba, tru nø perainrrab arrub kwaløm nui merrab kan mu møøbagucha kimø srusrø newan chishig lataitøwei na ñimun nun treeg kenamartrab. <sup>3</sup> Inchendø nane kørig isutan, tru ul purø may kebenøsrkamig tøgagúitøga tru Evan kebenøsrkøb lataitøwei ñimungucha mumay køben ñimui isubigu peløsrkøngarunrraitamab tru ñim isa kòmø pønrraigwanba, tabig chishchig Cristoinug pønrraigwanba. <sup>4</sup> Kaguende møikkøben ñimun tru nam eshka kusrenani

lataig kømøtø, Jesúsweiwan peemay eshkað kusrenanøb arrin kui, kabe tru ñim Espíritu Santo uta tøgagúigwan kømøtø, katøgan peg espíritun waminchib arrin kui, kabe Tiuswei wamwan ñim uta tøgagúigwan kømøtø, pegwan waminchib arrin kui inçhibigwane, trube, ñimbe chi chimø melabelø køn. <sup>5</sup> Cristo nøashib karua øri-lø misrøb, tru purab nørreelø chib pønrrabelai merrab chiyugucha lamíig kømur nagucha. <sup>6</sup> Pøs nabe nai wamindigube kan mørøptø purramdiig, may waminchimíig kuinaindøgucha, nebua kusreb asigube nabe maig kuigwan nebua ashibig kur. Iigwane chiyutøgucha ñim tørgandø ashchai kenamarig køn.

<sup>7</sup> Ñim nørreelø misrtrai, nabe naasiitø chigucha kømíig misrøb, Tiuswei tabig srø wamwan truburø chi utømø eshkað kusrenanøb pasrappe, ¿kabe nabe kaig marøb pasrabraig kø chindah? <sup>8</sup> Na ñimun purugub pasrønrrab, nabe katøgan iglesiameranguen kerrab lataig utamig nebubig køn, nai chi palab arrubigwan tøgagønrrab. <sup>9</sup> Pøs na ñimui utu Corintosrø uñib urasma nan chi palab arringucha, munguen tranrra cha, mi-amuig køn. Kaguende nan chi palab arrubigwane namui nunelø Macedoniasrøngurri amrrua, tranig køn. Chiyutøgucha nabe ñim ke nan tranrraindø, tranrraindø inçhimønrrab, nabe purø ashiptø megaig køn. Pøs katøgucha mun miamø, nabe treetø ka megabig megamønrrun. <sup>10</sup> Cristoi newan ciertonig nainug pasrai møra lataitøwei, na chi an purugúig utømø, tru møg inçhib tab kui mørøb waminchib pasraigwane Acaya pirausrøngucha nane muguen waminchimønrrai katønrraamøn. <sup>11</sup> ¿Chindimbagurri? ¿Pøs kabe na ñimun undaguig kømubra chindah? ¿Pøs Tiusbe asha pasran, nabe ñimun undaguig kui!

<sup>12</sup> Nabe tru purugurray chib miamø maig marøb ar-

rigwane marøbig maramønrrun, an utab pønrrøbendø, tru nam lataitøwei marøbelø ker chi køptø tru kemes-ratøguen møg inchib waminchib pønrramigwan labelan marbashmø kanmaytø kata pasrtrab. <sup>13</sup> Kaguende tru treeg inchibeløbe, Cristo cierton nøashib karua øriilø kømøn. Tru marøbeløbe ka may wamincha isatø marøbelø, Cristo nøashib karua øri latailø misrøb treeg inchibelø køn. <sup>14</sup> Inchen øyeegwane ke kwaara asamikkucha kømøn. Kaguende Satanástøweinguen kan ángel tabig tørigwan tøgagig lataitøwei misrøbig køn. <sup>15</sup> Inchawei øy-eebe kwaaramdiikkucha kømøn, pøs tru Satanás karuigwan marøb pønrrabeløgucha tru sølgandø tabigwan marøbelø misrøb pønrrøben. Pøs nømui kaig marimburo maig utamig køben, treegutøweim patsønrrun.

*Pablo chine chine kaig nebuinab megaig*

<sup>16</sup> Pøs nabe katøle trenchinrrab inchar: mugucha nane ke chugúi mormíig kui lataikkucha mara srua kømør-runrrigay cha. Inchendø ñim nan treeg isua tøgaguabe, trube, na chugúi mormíig kuingucha, nan treeg ka utørray chinrrab, na maitøguen møg inchib pasramig kønrrai. <sup>17</sup> Tru na naasiitø truba tab kui mørøb møg inchib waminchib pasraibe, nan Señor wamindingaruben wamindig kømøtø, chugúinguen mormubendø wamindi lataig, treeg køn. <sup>18</sup> Pøs truba yamelø møiløgøbenma pirauig maig køben treegu nømasiitø puro nørreelø mørørai inchib pønrrøbene, nagucha treetøwei puro nuig kui mørørai inchib pasrønrrab. <sup>19</sup> Ñimbe ya kusrebelø købendø, chugúinguen mormeelane, trube, ñimbe ke mørøguen isrømøzhig melabelø køn. <sup>20</sup> Møikkøben ñimun maig martrain chippe, ke treeg marøb melønrrai inchibigwanba, ñimun sötø pønsra nø tøgä kørrømisrtrab marøbigwanba, ñimun chi isa køben kerrawa, nui

marøbigwanba, ñimune chigucha kòmeelø marøb nuig misrøb pasrabigwanba, ñimun maløbøtø pashaguchib, treeg inchibigwanbabe, trube, truigwane ñimbe ke chi chimøzhiitø melabelø køn. <sup>21</sup> Pøs nambe øyeeg ke-namarøb pønrramibe yangucha kullaguelø købrain køn tamig, nane kørikken køtan.

Kaneløma ke nòmasiitø chinetø møg inchib wamincha mørene, treetøwei nagucha martrab, treeg wamindamibe na chugúi mormøgølig lataig wamindig kuindøgucha. <sup>22</sup> ¿Nømbe hebreosmera kø chindah? Nagucha hebreotøwein kur. ¿Nømbe Israelwei misaamera kø chindah? Nagucha Israelwei misaatøwein kur. ¿Nømbe Abrahamwei misaamera kø chindah? Nagucha Abrahamwei misaatøwein kur. <sup>23</sup> ¿Nømbe Cristoiwana marøb melabelø kø chindah? (Pøs chugúi mormíig lataitøwei waminchar) Nabe nøm lataitøguen kømø, masken marøb, marameløyugucha mas mur marøb, kailan keeri yau nømuna lataitø kømø, katø katø merrarrawa keeriinab, ichaguchibgucha, mam ichagutsamigwan nømuna lataitø kømø, ichagutsamburab ichagutsinab, katø katø ke yandø øsig kømurmab isui megamig pub, <sup>24</sup> katø trattrø pijibe judíosmera maig ichaguchibelø kuigwan treinta y nuevbatø ichagutsinab megabig kur. <sup>25</sup> Katø pønmay tsiitøga ichib srua kuinab, katø kan pijibe kwetchab sruutøga petinab, katø pønmay barco pitis misrøb chab mincha, piu asentaben, kan pijibe kwalma y mawa nane mar tøbøtaasrø pi srua yaig megamig nebugig køn. <sup>26</sup> Chu urastøgucha naimbe webya yamitø, yamitø nebuben, kanmaywane nørro pimerayu chine purayaig megamig nebuben, kanmaybe nileelai utuwan chi kuinanrraptiig purayamig nebuben, kanmaybe naim pirau misaameratøwei chigøben marinanrraptiig pureb yamig nebuben, kanmaywane judíos kømø misaamera chigøben mari-

nanrraptiig purayamig nebubig kòn. Inchen kanmaywane ciudayu korig kòmdiig inchibeløyu purayamig nebuben, katø kanmaywane mu misag warab waraimørø korig kòmdiigu purayamig nebuben, kanmaywane maryu chigøben kuinanrraptiig treegu pureb megamig nebuben, katø kanmaymerawane ka isatø ‘Cristogurri nunelø ker’ chibelø chigøben marinanrraptiig, treeg unamig nebubig kòn. <sup>27</sup> Marameløgucha purø murig, trurrigu ni mandøguen kømui megamig, treeg nebubig kòn. Katø katø kibguen kimøwei, katø parøgwai mørøb, pi mulgwai mørøb, katø katø chigucha mamíig megamig nebub, kørrag kui megamig nebub, asru kemig chigagúinab megamig nebub inchibig kòn.

<sup>28</sup> Inchen tru kømnetø kwalømmørig na isuim pasramibe iglesiamerabe mayamba chinchib kermab isub pasramig, truig købig kòn. <sup>29</sup> Møikkøben kullaarain pasrøbene, nan kullaaraig kui lataig købig kòn. Inchen møikkøben kaigu srurrengwanguaruinab megabene, nan pusrkwabig kòn. <sup>30</sup> Na møg inchib waminchib pasramig nebubene, na truburab kømfig kullaguig kuigu, truyube møg inchib waminchib pasramønrrun. <sup>31</sup> Namui Señor Jesucristoi Møskai, Tius tru managurri managatig mayanguen tabig wamindinabiibe nabe ka isatø inchib pasrømui asha pasran. <sup>32</sup> Rey Aretas karuigwan marøb wabig, tru Damasco ciudayu kubenadurbe tru damacenosmerai ciuda pøtøgatan laringaruin købig kòn, nan kemørtrab. <sup>33</sup> Inchen nane tru ciudayu pøtøgatan srug pirøbanrrig marigugurri kan pendanayu kørørøbelø kòn, kan tasinyu waya. Øyamay nabe truigwei taskugurri welula, ibig kur.

## 12

*Pablon Tius nuimburabig mu asiimíig pønrrabelan kena-*

*marøb*

<sup>1</sup> Nabe katøgucha naasiitø møg inchib waminchib pasramig køtan, treeg mariibe chi purugumfig kuindøgucha. Nabe piab lataigu na chigøben asiilanba, Señor nuimbura-belan nan kenamariilanba, trunun waminchab. <sup>2</sup> Nabe kan møg ashibig kur, Criston kørewa pasrabigwan, mõi ya catorce añosken køn. Truigwane tru pøn srømbalårngatig srua yaig købig køn. Nune asrbañau srua yaig køh, kabe asrbañau kømø, srua yaig køh, chindindø, truigwane maig kui mørmur. Trunune Tiustøwei asan. <sup>3-4</sup> Tru møwane tru srømbala Tiuswei purø tabzhiisrømay srua yaigwan nabe asha kur. (Nune asrbañau srua yaig køh, kabe asrbañau kømø, srua yaig køh, chindindø, truigwane maig kui mørmur. Trunune Tiustøwei asan.) Inchen trusrømbe ni kan mandø chaguen trendamgailø nõbe wamindi mørig køn, treegwane kan møwane waminchimønrrai meriilan. <sup>5</sup> Pøs nabe tru møweimburappe si møg inchib waminchib pasrabwei indamønrrun, pøs truiibe nawein kuinaben. Inchendø nabe naasiitø møg inchib waminchib pasrømøtø, na trengatig kømfig kullaguig kuinaigube møg inchib pasramønrrun. <sup>6</sup> Pøs nan møg inchib waminchib pasrag køben, na treeg inchib pasrainguen, nabe ke chugúi mørmfig lataig indig kømubsruinrrun. Kaguende nabe cierton waminchibsrubrainrrun. Inchendø nabe treebe marmumønrrun, na maig kuigwan asig tre lataitø kømøwei, na waminchen ñim møri lataitø kømøwei, mas nuikken kuin kui mugøben nan treeg isumønrrai.

<sup>7</sup> Øyeeg chigøben purø nõrreelø nan kenamarig, truilø nan purab nuig kurmab isub pasramig marmønrrai, nane nai asru chu uragucha kan kal lataig kebuchib pasrønrrai pasrig køn, Satanás ørig, ni mandøguen kømui pasramig kønrrai martrabig, na purab nuig misrøb pasramig

kømønrrai. <sup>8</sup>Inchen nabe iigwan Señorwan pønmay ‘tius-  
 manda kerrarra’ cha miaben, <sup>9</sup> Señorbe nane trenchibig  
 køn: “Tru nai ka yandø tab indig truitø ñune tsabø køn  
 cha. Kaguende tru nai maramburab marøb pasrabiibe  
 ñi truburab kømíig kullaguig kuigu masken tab kenamis-  
 ran” cha. Inchawei treeg købene, na truburab kømíig  
 kullaguig kuigu mayanguen tab kui mørøb møg inchib  
 waminchib pasramønrrun, Cristoi maramburab marøbig  
 nainug pasrønrrai. <sup>10</sup> Inchawei nabe na truburab kømíig  
 kullaguig kuigu lata, nan tsalø waminab pasraigu lata,  
 nan chi palabigu lata, Cristogurri nan kaig martrabgøba  
 indinab megaigu lata, nabe truba tab kui mørøb kasraarar.

*Pablo corintosreelan isub*

<sup>11</sup> Pøs nabe kan chugúi mormíig lataig indig køn.  
 Inchen na treeg inchainbe nane ñimweinrre indig køn.  
 Naimburab tabig waminchippe, ñimguen tabig wamindig  
 kønrraptiig kur. Kaguende tru Cristo nøashib karua  
 øriilø misrøb purab nørreelø chib pønrrabelaimbe nabe  
 chiyugucha lamíig kømur, nabe maya chigucha kømíig  
 kuinaindøgucha. <sup>12</sup> Cristo nan nøashib karua ørig kuin  
 kui asamig, maig kuindøgucha tammay nabe ñimui utu kena-  
 marig køn: Tius naba pasrain kui ashchai mariilø marøb,  
 kwaara asamdeelø marøb, maramburab mariilø marøb,  
 treeg. <sup>13</sup> Tru katøgan iglesiameran lataguen kømø, ¿nabe  
 ñimun chiyurren lameelø marøb kørrøra pønstrøbrah?  
 Na ñimun tranrrai miamuig, trutøwein køn. Pøs na  
 miamub kalø marigwan ulø paymø pesannarra chinrrab  
 inchar. <sup>14</sup> ¡Au! Nabe katøguen chab tamaraguen megar  
 ñimun ashchab attrab, møimbabe chabguen pønmayguen  
 kønrrab køben. Treetøwei katø na ñimun mianrrab  
 kømø arrumønrrun. Kaguende nabe ñim chi tøgagúig-  
 wan isua lamøtø, ñimun isur. Pøs kaguende ureemera



møskalayasis esegab tulisamig kòmõtø, uregweyasig esegab tulishib melamibe møskalainguen kòn. <sup>15</sup> Inchawei nabe tab kui kasraatø naiwan kerrigu kastamønrrun, naasiitøweinguen ñimuyasig patsønrrai marøb. Na ñimun mas undaarabene, ¿ñimgurrimbe nane tre undaaramønrrapteh?

<sup>16</sup> Pøs trube, naimburappe ñimbe ashibeløguen na ñimun tranrrai miamuigwan. Inchendø nabe ke chi maramdiig kõtashib ashib megabig køndainabig kuig køppe, trube, ¿ke chi isa køben kabe ñimun chi wesrabraig køppeendi? <sup>17</sup> ¿Kabe na tru møilan køsrøn na ñimuisrømay karua øriiløtøga chi isa køben, kabe ñimun chi wesrabraig kø chindah? <sup>18</sup> Nabe Titone: “Tius- manda ashchab irrunrrig” cha, Cristogurri namui katøgan nunewanba nun lincha inrrai ørig kuig kòn. ¿Kabe Titobe ñimune chi isa køben chi wesraig køppeendi? ¿Nambe yamba pailøba treetøwei kandø isua marøb, katø pailøba yamba tru maywandøwei pønrrammørgøppeh?

<sup>19</sup> Nambe ñimui merrab ka tab wegørrag køptørre inchib pønrrabelø kui, ¿ñimbe katøgucha møi øyangatig kabe treeg asønain pønrrøgueh? Treeg kòmõtø, nambe waminchippe, Cristoinug pønrrabelø kui asamdiig Tiuswei merrab waminchib pønrrer. Inchen nam kerrigu mariiløbe, ñim, nai undaarailø, Tiusweimburab ñim nør-rørab amrrain kòn. <sup>20</sup> Pøs nane køristø køtan na ñimuisrø puben, na ñimun mailø kønrrai isua pasraig ñim treelø kømøwei, katø ñimgurri nan maig kønrrai isua pønrraig treeg kømøwein køptinchen tsaatø indinab pønrrainabgunmab. Nane køristø køtan ñimui utu aleguiyam lailø, møikkøben chi tøgagøben pusrkwai asiilø, purø trømbøig namig kui indiilø, nøøøø katøgan sötømisrøb tarømisrøb ambiilø, katøganuimburab wam kusrub wamindiilø, isa wamincha møriilø, purø nørreelø misrøb pønrrailø, mu-

maygucha kəmíig mara pənsrailə, treeg kənrraitamab.  
<sup>21</sup> Incha nane kərig isutan na ñimun katə ashchab puben, Tiusbe ñimui merrab nan kərig purəøren, truba yamelaimburə nan kisamig nebunrraitamab isua, tru merrabwan nəmui kəsəngənraptiig mariilanba, mөгueləba, ishumburmeraba trəmbəig mariilanba, mu mandimíig chi marөг kəben trəmbəig maramitə srua ambiilanba isua mərmuin kəben.

## 13

### *'Isua ashiptə melənrriigay' chib wamindiilə srabeig*

<sup>1</sup> Na ñimun ashchab arrumig məimbabe pənmayguen kənrwab kən. Chigəben kalə puigwan asha marəppe, kan pailə kui, pənelə kui 'maig purayaigwan treeg kən' cha nəməshib eshkabendəwei, maig kənrwabigwan asha maramig kən. <sup>2</sup> Nabe tru pamay kənrwabiyu marig merrabwan arrua, ñimba pasrəwa, kanmaytə isua kənrrai eshkaig kəbig kuig kən. Na məi katə ñimba pasrəwəgucha katəle katə eshkanrrab inchar, tru merrabwan kaig marəbelanba, mayeelə katəganelanba na katəle arruppe, kan waachaalleelə chib mun lastima ashchab atrab kəmur cha, <sup>3</sup> kaguen ñimbe Cristo nagurri waminchib pasrabig kuitashchab ashig kəb ñimbe trurre lab kuig kəben. Cristobe ñimba mumay kəmigwane chi martrabga kaizhikkucha kəmətə, nəbe ñimui utu maramburab marəbig kən. <sup>4</sup> Pəs isa kəmə, Cristobe misagwei asr latakəwei kullag kua, kurusyū mesrəben, kwaig kən. Inchendə Tiuswei maramburab marəbiitəga əsig wan. Pəs katə treetəwei nambe Cristoinuube kullaguelə kuinabendə, Tiuswei maramburab marəbiitəga Cristoba əsig pənrramənrurun ñimuyasig marəb pənrwənrwab.

<sup>5</sup> Ñimui isubigwan Jesucristoinug pasra pønrraigu pønrrabraitashchab tab isua ashib, maig købraitashchab ñimasiitøwei paya mørøb inday. ¿Jesucristo ñimuinug pasrabig kuin kui ñimbe ashmeelø kø chindah? tru ñim maig pønrraitashchab isub pønrraigu chi kalø webammuiikkurrimbe. <sup>6</sup> Pøs namui isubigwan Cristoinug pasra tøgar kua nam tabig webamba pønrraigwan ñim nebua ashchun. <sup>7</sup> Incha nambe Tiuswan purugurra cha mier, ñim chigucha chi kalø marøb kømønrrai. Kabe tru namun mailø kuitashchab ashen, tab webambigwan ashchai isua kømøtø, ñim tabigwan marøbelø kønrrai isua inder, ñimuin kabyube nambe kegørra pønrrai lataig asønaindøgucha. <sup>8</sup> Kaguende nambe tru newan ciertonigwane chi treeg kømønrrai martrab indamgaig køn. Treeg kømøtø, tru ciertonigweimburab nam marøb pønrramibe køn. <sup>9</sup> Inchawei namun kullaatø mørøraingucha, ñim tabig mur pønrrøbene, kasraarabelø ker. Incha nambe Tiuswan iigwan miabelø ker: ñim newan tabelø kønrraimab isua. <sup>10</sup> Inchawei øyeekkurri nabe yabsrø pasrappatøwei iigwan pørar, tru na ñimuisrø pua, nai maramigwan na tsakkandø marøb pasrønrrab arrumig kømønrrai. Señor nan ashib karub pasrønrrai tranøppe, pinishib inrrain kømøtø, kusrua pønrsøbguen inrrai tranig køn.

*'Ka amøñiguh' chib wamindiilø srabeig*

<sup>11</sup> Trube, mømibe yandø, nai nunelø, maya nuguen kasraaray. Ñimbe newan tabelø kønrrab inchib, na 'øyeeg, øyeeg melønrrigay' chib wamindigwan møra marøb, katø pønrrabgucha kandø isua pønrrønrrigay. Katø kangurrin kangurri tab warønrrigay. Tius tru undag købig tru chi isumgaig tab købiibe ñimba pasrønrrun. <sup>12</sup> Kangurrin kangurri 'ka amøñiguh' chib tabig wamab,

Tiuswei undag købiitøga tasig tranay. <sup>13</sup> Tiuswei misaamera mayeeløba yuelø ñimun 'ka amøñiguh' chib wam øran.

<sup>14</sup> Señor Jesucristoi ka yandø tab indiiba, Tiuswei undag købiiba, Espíritu Santoi tru trakkandø lincha pasraibabe ñim mayeeløba pasrønrraimab isur.

Nacom Pejume Diwesi po diwesi pena jume diwesi xua  
Jesucristo yabara tinatsi  
New Testament in Guambiano

copyright © 2010 Wycliffe Bible Translators, Inc.

Language: Guambiano

Translation by: Wycliffe Bible Translators, Inc.

### Copyright Information

© 2010, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Guambiano

**© 2010, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

---

